

Na osnovu člana 56. stav (2) tačka d) Zakona o visokom obrazovanju (“Službene novine Zeničko-dobojskog kantona”, broj: 12/22) i člana 66. stav (2) tačka d) Statuta Univerziteta u Zenici, Senat Univerziteta u Zenici na svojoj 02. sjednici održanoj 28.02.2023 godine, donio je

P R A V I L N I K

o naučnim i istraživačkim zvanjima Univerziteta u Zenici

POGLAVLJE I. - OPŠTE ODREDBE

Član 1.

(Predmet Pravilnika)

Pravilnikom o naučnim i istraživačkim zvanjima Univerziteta u Zenici (dalje: Pravilnik) uređuje se: naučnoistraživačka djelatnost, nosilac naučnoistraživačke djelatnosti, naučna i istraživačka zvanja, uslovi i postupak za izbor u naučna i istraživačka zvanja na Univerzitetu u Zenici (dalje: Univerzitet).

Član 2.

(Naučnoistraživačka djelatnost)

- (1) Naučnoistraživačka djelatnost u smislu ovog pravilnika obuhvata naučnoistraživački rad, objavljivanje rezultata naučnoistraživačkog rada, osposobljavanje kadrova za naučnoistraživački rad i usavršavanje naučnika i istraživača.
- (2) Naučnoistraživački rad obuhvata fundamentalna (osnovna), primijenjena i razvojna istraživanja u skladu sa Zakonom o naučnoistraživačkoj djelatnosti.
- (3) Rezultati naučnoistraživačkog rada vrednuju se objavljivanjem u naučnim publikacijama ili provjerom u praksi, a trebaju da sadrže elemente izvornosti i novosti.
- (4) Osposobljavanje kadrova za naučnoistraživački rad podrazumijeva stvaranje uslova za sticanje naučnog stepena magistra i doktora nauka.
- (5) Usavršavanje naučnika i istraživača podrazumijeva sticanje novih i produblivanje_ stečenih zvanja putem različitih oblika usavršavanja.

Član 3.

(Univerzitet kao nosilac naučnoistraživačke djelatnosti)

Naučnoistraživačku djelatnost obavlja Univerzitet putem organizacionih jedinica (fakulteta, naučnih instituta, centara) i podorganizacionih jedinica (naučnih instituta organizacionih jedinica i centara).

Član 4.

(Obavljanje naučnoistraživačkog rada)

Naučnoistraživački rad na Univerzitetu, pored akademskog osoblja obavljaju naučnici i istraživači izabrani u odgovarajuće naučno odnosno istraživačko zvanje u skladu sa Zakonom o naučnoistraživačkoj djelatnosti, Statutom Univerziteta i ovim Pravilnikom.

POGLAVLJE II. NAUČNICI I ISTRAŽIVAČI

Član 5. (Naučnici i istraživači)

- (1) Naučnik je lice izabrano u naučno zvanje, pod uslovima i po postupku utvrđenom Zakonom o naučnoistraživačkoj djelatnosti, Statutom Univerziteta i ovim Pravilnikom, kao i lice izabrano u akademsko zvanje docenta, vanrednog profesora i redovnog profesora pod uslovima i po postupku utvrđenom Zakonom o visokom obrazovanju i Statutom.
- (2) Istraživač je lice izabrano u istraživačko zvanje, pod uslovima i na način utvrđen Zakonom o naučnoistraživačkoj djelatnosti, Statutom Univerziteta i ovim Pravilnikom, kao i lice izabrano u saradničko zvanje pod uslovima i po postupku utvrđenom Zakonom o visokom obrazovanju i Statutom.

Član 6. (Naučna zvanja)

- (1) Naučna zvanja u smislu Zakona, Statuta Univerziteta i ovog Pravilnika su: *naučni savjetnik, viši naučni saradnik, naučni saradnik.*
- (2) Minimalni uslovi za izbor naučnika su:
 - a. *za naučnog savjetnika:* proveden najmanje jedan izborni period u zvanju višeg naučnog saradnika u odgovarajućoj naučnoj oblasti, minimum kvantitativnih uslova za odgovarajuću naučnu grupaciju predviđenih Pravilnikom o minimalnim uslovima za izbor u naučna zvanja,
 - b. *za višeg naučnog saradnika:* proveden najmanje jedan izborni period u zvanju naučnog saradnika u odgovarajućoj naučnoj oblasti, minimum kvantitativnih uslova za odgovarajuću naučnu grupaciju predviđenih Pravilnikom o minimalnim uslovima za izbor u naučna zvanja,
 - c. *za naučnog saradnika:* naučni stepen doktora nauka u odgovarajućoj naučnoj oblasti, minimum kvantitativnih uslova za odgovarajuću naučnu grupaciju predviđenih Pravilnikom o minimalnim uslovima za izbor u naučna zvanja.

Član 7. (Istraživačka zvanja)

- (1) Istraživačka zvanja su u smislu Zakona, Statuta Univerziteta i ovog Pravilnika: *istraživač savjetnik, viši istraživač saradnik i istraživač saradnik*
- (2) Minimalni uslovi za izbor istraživača su:
 - a. *za istraživača savjetnika:* završen stepen drugog ciklusa (magisterij), s najmanje 300 ECTS bodova i ostvarena najniža prosječna ocjena 8,0 (osam) ili 3,5 (tri i po) na oba ciklusa studija, objavljena najmanje 3 (tri) recenzirana naučna rada iz odgovarajuće oblasti.
 - b. *za višeg istraživača saradnika:* završen stepen drugog ciklusa (magisterij), s najmanje 300 ECTS bodova i ostvarena najniža prosječna ocjena 8,0 (osam) ili 3,5 (tri i po) na oba ciklusa studija,
 - c. *za istraživača saradnika:* završen stepen prvog ciklusa, s najmanje 240 ECTS bodova i ostvarena najniža prosječna ocjena 8,0 (osam) ili 3,5 (tri i po).
- (3) Izuzetno, od odredbi iz stava (2) tačke a) i b) ovog člana, na kandidate koji su završili stepen prvog ciklusa studija prije stupanja na snagu Zakona o naučnoistraživačkoj djelatnosti (07.10.2017. godine), ne primjenjuju se odredbe koje se odnose na minimalni uslov o ostvarenoj najnižoj prosječnoj ocjeni osam (8) ili 3,5 (tri i po) na stepenu prvog ciklusa studija.

Član 8.
(Period na koji se biraju naučnici i istraživači)

Naučnoistraživačko osoblje bira se na određeni izborni period, i to:

- a. naučni saradnik na period od pet godina s mogućnošću jednog ponovnog izbora;
- b. viši naučni saradnik na period od šest godina s mogućnošću jednog ponovnog izbora;
- c. naučni savjetnik trajno;
- d. istraživač saradnik na period od četiri godine bez mogućnosti ponovnog izbora;
- e. viši istraživač saradnik na period od pet godina s mogućnošću jednog ponovnog izbora;
- f. istraživač savjetnik na period od pet godina s mogućnošću jednog ponovnog izbora.

Član 9.
(Zasnivanje radnog odnosa i prestanak ugovora o radu)

- (1) Radni odnos na Univerzitetu naučnici i istraživači zasnivaju zaključivanjem ugovora o radu, nakon provedenog javnog konkursa za izbor i donošenja konačne odluke o izboru u naučno odnosno istraživačko zvanje.
- (2) Član naučnoistraživačkog osoblja zaključuje ugovor o radu na period na koji je izabran, naučnog savjetnika, koji zaključuje ugovor o radu na neodređeno vrijeme.
- (3) Nakon isteka izbornog perioda Univerzitet obavezno zaključuje novi ugovor o radu sa svakim članom naučnoistraživačkog osoblja koji je izabran u isto ili više naučno ili istraživačko zvanje.
- (4) Kada član naučnoistraživačkog osoblja nakon isteka izbornog perioda ne bude izabran u isto ili više zvanje, visokoškolska ustanova može, prije otkazivanja ugovora o radu, ponuditi članu naučnoistraživačkog osoblja zaključivanje novog ugovora o radu na poslovima za koje se ne traži izbor u naučnoistraživačko zvanje, ako za to postoji mogućnost i potreba.
- (5) Član naučnoistraživačkog osoblja koji navršši 65 godina života i ispuni zakonske uslove za prestanak radnog odnosa ne može na osnovu konkursa biti biran u isto ili više zvanje.

Član 10.
(Mirovanje perioda izbora u naučnoistraživačka zvanja)

- (1) Naučniku i istraživaču koji je na neplaćenom odsustvu, porodijskom odsustvu i odsustvu radi njege djeteta, bolovanju u trajanju dužem od 3 (tri) mjeseca, naučniku koji je na funkciji direktora i pomoćnika direktora na Institutu Univerziteta, te u drugim slučajevima utvrđenim zakonom, rokovi za izbor u naučnoistraživačka zvanja miruju za period trajanja odsustva i ne uračunavaju se u izborni period, ukoliko je to za naučnika, odnosno istraživača, povoljnije.
- (2) O mirovanju izbornog perioda odlučuje rektor, na zahtjev radnika, uz koji se prilaže odgovarajući dokaz o razlozima iz prethodnog stava.

POGLAVLJE III. POSTUPAK IZBORA U NAUČNA I ISTRAŽIVAČKA ZVANJA

Član 11.
(Pokretanje postupka za izbor)

- (1) Zbog isteka perioda na koji su naučnici i istraživači izabrani, ili zbog potrebe naučno-istraživačke institucije Univerziteta za većim brojem naučnika i istraživača u naučno-istraživačkom procesu, pokreće se postupak za izbor naučnika i istraživača u isto ili više zvanje, odnosno za izbor novih naučnika i istraživača na Univerzitetu.
- (2) Postupak izbora naučnika i istraživača, u isto ili više zvanje, pokreće se na zahtjev radnika najkasnije 6 (šest) mjeseci prije isteka izbornog perioda.
- (3) Postupak izbora novih naučnika i istraživača pokreće se najviše dva puta godišnje.

Član 12.
(Javni konkurs)

- (1) Izbor naučnog i istraživačkog osoblja vrši se javnim konkursom, u skladu s kriterijima određenim Zakonom, Statutom, ovim Pravilnikom i drugim propisima Zeničko-dobojskog kantona i Univerziteta.
- (2) Postupak napredovanja naučnika i istraživača u više zvanje i reizbor, u svim slučajevima, vrši se javnim konkursom, na način utvrđen Statutom i ovim Pravilnikom.
- (3) Konkurs iz stava (1) ovog člana, obavezno se raspisuje za sva naučna i istraživačka zvanja i objavljuje u najmanje jednom dnevnom listu, kao i na web stranici Univerziteta.

Član 13.
(Prijedlog za raspisivanje javnog konkursa)

- (1) Izbor naučnika i istraživača vrši Naučno vijeće Instituta Univerziteta uz prethodnu saglasnost Senata Univerziteta.
- (2) Prijedlog za raspisivanje javnih konkursa iz stava (1) i stava (2) člana 12. ovog Pravilnika podnosi Naučno vijeće Instituta Univerziteta, koje je iskazalo potrebu za pokretanje procedure, uz obrazložen zahtjev centra.
- (3) Na osnovu prijedloga odluke Naučnog vijeća Instituta Univerziteta za raspisivanje javnog konkursa, iz stava (1) ovog člana, Senat Univerziteta donosi konačnu odluku o raspisivanju istog.

Član 14.
(Sadržaj javnog konkursa)

- (1) Na osnovu dostavljenog prijedloga iz prethodnog člana ovog Pravilnika, Senat raspisuje konkurs za izbor naučnika i istraživača zbog postojanja potrebe za nedostajućim naučnim i istraživačkim osobljem, reizbora ili izbora u više naučno i istraživačko zvanje.
- (2) Rok za podnošenje prijave na konkurs, iz stava 1. ovog člana, je 15 dana, računajući od dana njegovog objavljivanja.

Član 15.
(Komisija za pripremanje prijedloga za izbor)

- (1) Nakon raspisanog konkursa, a radi pripremanja prijedloga za izbor, imenuje se komisija od najmanje 3 (tri) člana iz redova naučnika u istom ili višem zvanju od onoga u koje se kandidat bira, odnosno iz reda nastavnika izabranih u odgovarajuće naučno-nastavno, odnosno umjetničko-nastavno zvanje, u roku od 30 dana od dana objavljivanja konkursa.
- (2) Komisiju, iz prethodnog stava, imenuje Naučno vijeće instituta.
- (3) Većina članova komisije mora biti iz uže, a ostali iz srodne naučne, oblasti, za koju se kandidat bira.

Član 16.
(Kriteriji za izbor naučnika i istraživača)

- (1) Ukoliko se na konkurs za izbor u naučno zvanje Naučni savjetnik, Viši naučni saradnik ili Naučni saradnik prijavi veći broj kandidata koji ispunjavaju uslove za izbor u odnosu na broj koji je tražen konkursom, kod utvrđivanja konačnog prijedloga za izbor u obzir se uzimaju relevantni dokazi predviđeni Pravilnikom o minimalnim uslovima za izbor u naučna zvanja.
- (2) Ukoliko se na konkurs za izbor u istraživačko zvanje Istraživač savjetnik i Viši istraživač saradnik, prijavi veći broj kandidata koji ispunjavaju uslove za izbor u odnosu na broj koji je tražen konkursom, kod utvrđivanja konačnog prijedloga za izbor, kriteriji su sljedeći: visina prosječne ocjene ostvarene u toku magistarskog i dodiplomskog studija, nagrada dekana i rektora, nivo poznavanja svjetskog jezika, broj objavljenih naučnih i stručnih radova.

- (3) Ukoliko se na konkurs za izbor u istraživačko zvanje Istraživač saradnik, prijavi veći broj kandidata koji ispunjavaju uslove za izbor u odnosu na broj koji je tražen konkursom, kod utvrđivanja konačnog prijedloga za izbor, kriteriji su sljedeći: visina prosječne ocjene ostvarene u toku dodiplomskog studija, visina prosječne ocjene iz predmeta uže naučne oblasti na koju se kandidat bira, nagrada dekana i rektora, nivo poznavanja svjetskog jezika, dužina studiranja i broj objavljenih naučnih i stručnih radova.

Član 17.
(Vrednovanje kriterija za izbor naučnika)

Vrednovanje kriterija za izbor naučnika vrši se prema Pravilniku o minimalnim uslovima za izbor u naučna zvanja.

Član 18.
(Vrednovanje kriterija za izbor istraživača)

- (1) Vrednovanje kriterija za izbor u istraživačka zvanja Istraživač savjetnik i Viši istraživač saradnik, vrši se na sljedeći način:
- a) visina ukupne prosječne ocjene ostvarene na odgovarajućem magistarskom/drugom ciklus studija, vrednuje se maksimalno s 30 bodova, a izračunava se na način da se ukupno ostvarena ocjena pomnoži s 3 (tri) i zaokruži na dvije decimale;
 - b) visina ukupne prosječne ocjene ostvarene na dodiplomskom/prvom ciklusu studija, vrednuje se maksimalno s 30 bodova, a izračunava se na način da se ukupno ostvarena ocjena pomnoži s 3 (tri) i zaokruži na dvije decimale;
 - c) kandidatu koji je dobitnik nagrade dekana za pokazani uspjeh u toku školovanja, dodjeljuje se 2 (dva) boda, a kandidatu koji je dobitnik nagrade rektora za pokazani uspjeh u toku školovanja, dodjeljuje se 5 (pet) bodova;
 - d) poznavanje jednog svjetskog jezika dokazuje se uvjerenjem izdatim od strane verificirane institucije ili uvjerenjem o položenim ispitima iz tog svjetskog jezika. Bodovanje se vrši na osnovu nivoa poznavanja svjetskog jezika, na način da se za svaki nivo poznavanja svjetskog jezika, kandidatu dodjeljuje po (jedan) bod;
 - e) pokazan smisao za istraživački rad vrednuje se na način da se kandidatu koji ima više objavljenih radova daje prednost u odnosu na druge kandidate s istim brojem bodova.
- (2) Vrednovanje kriterija za izbor u istraživačko zvanje Istraživač saradnik, vrši se na sljedeći način:
- a) visina ukupne prosječne ocjene ostvarene na dodiplomskom/prvom ciklusu studija, vrednuje se maksimalno s 30 bodova, a izračunava se na način da se ukupno ostvarena ocjena pomnoži s 3 (tri) i zaokruži na dvije decimale;
 - b) visina prosječne ocjene iz predmeta uže naučne oblasti na koju se kandidat bira, vrednuje se maksimalno s 30 bodova, a izračunava se tako što se ostvarena ocjena pomnoži s 3 (tri) i zaokruži na dvije decimale;
 - c) kandidatu koji je dobitnik nagrade dekana za pokazani uspjeh u toku školovanja, dodjeljuje se 2 (dva) boda, a kandidatu koji je dobitnik nagrade rektora za pokazani uspjeh u toku školovanja, dodjeljuje se 5 (pet) bodova;
 - d) dužina studiranja vrednuje se s 5 (pet) bodova kandidatu koji je studij završio u roku, odnosno s 3 (tri) boda kandidatu koji je studij završio u apsolventskom roku. Pod završetkom studija u roku podrazumijeva se završetak studija prije početka apsolventskog roka za tu generaciju.
 - e) poznavanje jednog svjetskog jezika dokazuje se uvjerenjem izdatim od strane verificirane institucije ili uvjerenjem o položenim ispitima iz tog svjetskog jezika. Bodovanje se vrši na osnovu nivoa poznavanja svjetskog jezika, na način da se za svaki nivo poznavanja svjetskog jezika, kandidatu dodjeljuje po (jedan) bod;
 - f) pokazan smisao za istraživački rad vrednuje se na način da se kandidatu koji ima više objavljenih radova daje prednost u odnosu na druge kandidate s istim brojem bodova.

Član 19.

(Rad Komisije za pripremanje prijedloga za izbor u naučna i istraživačka zvanja)

- (1) Komisija za pripremanje prijedloga za izbor sačinjava priprema izvještaj o prijavljenim kandidatima i predlaže za izbor kandidata ili više njih u skladu sa uslovima iz konkursa.
- (2) Prilikom predlaganja kandidata, komisija je dužna poštovati minimalne uslove za izbor u odgovarajuće naučno ili istraživačko zvanje, u skladu sa Zakonom, Statutom i ovim Pravilnikom.
- (3) Komisija sačinjava zajednički izvještaj samo za one kandidate čije su prijave potpune i blagovremene, u roku od 30 dana od imenovanja i dostavlja ga Naučnom vijeću Instituta koje ju je imenovalo.
- (4) Prijave kandidata koje su neblagovremene i nepotpune komisija odbacuje putem pisane obavijesti koja se dostavlja svakom kandidatu, koju potpisuje predsjednik komisije, s pravnom poukom o mogućnosti ulaganja prigovora Naučnom vijeću Instituta, putem protokola Instituta, u roku od 8 dana od dana prijema obavijesti.
- (5) Izvještaj iz stava (1) ovog člana mora biti potpisan od strane svih članova komisije. Ukoliko neko od članova komisije nije saglasan s prijedlogom o izboru dužan je svoje izdvojeno mišljenje, uz detaljna obrazloženja zbog čega se ne slaže s ostalim članovima komisije, potpisati i dostaviti u pisanom obliku, u kojem slučaju ono čini sastavni dio izvještaja komisije.
- (6) Izvještaj komisije, pored ostalog, obavezno mora sadržavati potpuna i jasna obrazloženja o ispunjavanju odnosno neispunjavanju uslova za izbor u naučno ili istraživačko zvanje traženo konkursom poimenično za svakog kandidata, a na osnovu priloženih dokaza o ispunjavanju posebnih uslova za izbor propisanih Zakonom, Statutom i ovim Pravilnikom.
- (7) U slučaju da se na konkurs prijavi veći broj kandidata od broja koji je utvrđen konkursom, a koji ispunjavaju uslove za izbor u naučno odnosno istraživačko zvanje traženo konkursom, utvrđene Zakonom i Statutom, komisija za pripremanje prijedloga za izbor vrši izbor kandidata u skladu sa kriterijima iz člana 16. ovog Pravilnika.
- (8) Na osnovu kriterija iz člana 16. ovog Pravilnika i formulisanih obrazloženja iz stava (6) ovog člana, komisija u svom izvještaju utvrđuje konačan prijedlog onog broja kandidata za izbor u naučno odnosno istraživačko zvanje, koji ne može biti veći od onog koji je utvrđen konkursom.

Član 20.

(Izvještaj Komisije za pripremanje prijedloga za izbor u naučna i istraživačka zvanja)

- (1) Izvještaj komisije treba da sadrži podatke, kako slijedi:
 - a) podatke o sastavu komisije (ime i prezime, zvanje, visokoškolsku ustanovu i naučnu oblast izbora za sve članove komisije),
 - b) podatke o raspisanom konkursu (vrstu konkursa, naziv naučne oblasti ili naučno, odnosno istraživačko zvanje u koje se vrši izbor, broj kandidata koji se traže konkursom, datum i mjesto objavljivanja konkursa, te Odluku Naučnog vijeća Instituta o imenovanju komisije),
 - c) osnovne biografske podatke za kandidate čije su prijave potpune i blagovremene (ime, ime jednog roditelja, prezime, datum i mjesto rođenja, podaci o zaposlenju i radnom mjestu, članstvo u naučnim i stručnim organizacijama ili udruženjima, podaci o podaci o poznavanju stranih jezika),
 - d) podatke o obrazovanju kandidata (podaci o osnovnom studiju – I ciklus, magistarskom studiju – II ciklus i doktorskom studiju – III ciklus, naziv ustanove na kojoj je kandidat diplomirao/magistrirao/doktorirao, podaci o ostvarenoj prosječnoj ocjeni za istraživačka zvanja, podaci o prethodnom izboru u naučno ili istraživačko zvanje uz navođenje naziva institucije gdje je izbor izvršen i godinom izbora).
- (2) Izvještaj komisije treba da sadrži pregled i ocjenu naučne, odnosno istraživačke aktivnosti, analizu radova, naučni odnosno istraživački doprinos.

- (3) U prilogu izvještaja navodi se spisak radova koje je kandidat izradio kao autor, kao saradnik, spisak objavljenih radova u naučnim i stručnim časopisima i zbornicima kao i spisak referata na kongresima i spisak patenata.

Član 21. **(Prijedlog Komisije o izboru)**

- (1) Na kraju izvještaja, komisija decidno formuliše prijedlog u koje se naučno ili istraživačko zvanje kandidat bira i daje zaključno mišljenje koje predstavlja obrazloženje prijedloga komisije.
- (2) Ukoliko više kandidata od broja traženih konkursom, ispunjava uslove za izbor u zvanje, komisija predlaže kandidate koji imaju najveći broj bodova, s naznakom za koje zvanje se predlaže u skladu sa konkursnim zahtjevom.
- (3) Članovi komisije, svojim potpisom, potvrđuju saglasnost za izvještajem.
- (4) Ukoliko neko od članova komisije nije saglasan sa prijedlogom o izboru, obavezan je svoje izdvojeno mišljenje, uz detaljna obrazloženja zbog čega se ne slaže sa ostalim članovima komisije, potpisati i dostaviti u pisanom obliku, u kom slučaju ono čini sastavni dio izvještaja komisije.

Član 22. **(Rad Naučnog vijeća Instituta po dostavljenom izvještaju komisije)**

- (1) Komisija za pripremanje prijedloga za izbor u naučna i istraživačka zvanja, izvještaj dostavlja Naučnom vijeću.
- (2) Naučnom vijeću se dostavljaju i primjedbe na izvještaj komisije, i to najkasnije 24 sata prije održavanja sjednice na čijem se dnevnom redu nalazi predmetni izvještaj.
- (3) Naučno vijeće razmatra izvještaj komisije i primjedbe na isti, ukoliko su dostavljene, te utvrđuje prijedlog za izbor u naučna ili istraživačka zvanja i dostavlja ga Senatu radi davanja saglasnosti.
- (4) Naučno vijeće dostavlja Senatu:
 - a) izvještaj komisije,
 - b) prijedlog odluke Naučnog vijeća o prihvatanju ili neprihvatanju izvještaja komisije s odgovarajućim prijedlogom i
 - c) primjedbe na izvještaj komisije, ukoliko su dostavljene u pisanoj formi.
- (5) Senat Univerziteta je dužan, najkasnije u roku od 30 (trideset) dana od prijema prijedloga, dostaviti svoju saglasnost, odnosno odbiti davanje saglasnosti.
- (6) Ako Senat Univerziteta ne postupi u smislu stava (5) ovog člana ili u utvrđenom roku ne zatraži dodatne podatke, Naučno vijeće Instituta može izvršiti izbor.

Član 23. **(Odgovornost direktora za provođenje postupka za pripremanje prijedloga za izbor)**

- (1) Direktor Instituta Univerziteta je odgovoran da se postupak za pripremanje prijedloga za izbor u zvanje naučnika i istraživača, provede, u rokovima utvrđenim ovim Statutom i Pravilnikom.
- (2) Ako se započeti postupak izbora u naučnoistraživačko zvanje ne okonča u roku od 6 (šest) mjeseci, računajući od dana raspisivanja konkursa, Senat će konkurs poništiti.
- (3) Ukoliko se započeti postupak ne okonča u roku navedenom u stavu (2) ovog člana, direktor može pokrenuti postupak za utvrđivanje odgovornosti predsjednika i članova komisije.

POGLAVLJE IV. PRELAZNE I ZAVRŠNE ODREDBE

Član 24.

- (1) Matične katedre fakulteta pokreću inicijativu za raspisivanje konkursa za izbor naučnika i istraživača za užu naučnu, odnosno umjetničku oblast, za koju su matične i dostavljaju je naučno-nastavnom vijeću fakulteta, koje utvrđuje prijedlog za raspisivanje konkursa i provodi dalju proceduru izbora u naučna i istraživačka zvanja utvđenu članovima 14. i 15. ovog Pravilnika.
- (2) U skladu sa stavom (1) ovog člana, dekan fakulteta Univerziteta je odgovoran da se postupak za pripremanje prijedloga za izbor u zvanje naučnika i istraživača provede u rokovima utvrđenim Statutom i ovim Pravilnikom.

Član 25. (Izmjene i dopune)

Izmjene i dopune ovog Pravilnika vrše se na način i po postupku utvrđenom za njegovo donošenje.

Član 26. (Tumačenje)

Za tumačenje odredaba ovog Pravilnika nadležan je Senat Univerziteta.

Član 27. (Stupanje na snagu)

- (1) Ovaj Pravilnik stupa na snagu narednog dana od dana objavljivanja na oglasnoj tabli Univerziteta.
- (2) Stupanjem na snagu ovog Pravilnika prestaje da važi Pravilnik o naučnim i istraživačkim zvanjima Univerziteta u Zenici, broj: 01-108-702- 3118 /10 od 03.11.2010.godine i Pravilnik o dopunama Pravilnika o naučnim i istraživačkim zvanjima Univerziteta u Zenici, broj: 01-108-702-1005/11 od 02.03. 2011.godine.

Broj: 01-02-1-739/23.
Zenica, 28.02.2023.godine

PREDSJEDAVAJUĆA SENATA
Prof.dr.sc. Larisa Velić